

ՀԱՄԱՇԽԱՐՀԱՅԻՆ ԱՌԱՔԵԼՈՒԹՅԱՆ ԵՎ ԱՎԵՏԱՐԱՆՉՈՒԹՅԱՆ ԺԱ ՀԱՄԱԺՈՂՈՎԸ ԲՐԱԶԻԼԻԱՅԻ ՍԱԼՎԱԴՈՐ ՔԱՂԱՔՈՒՄ

(24 նոյեմբեր-3 դեկտեմբեր 1996)

Թուրաֆանչյուր յոթ-ութ տարին մեկ անգամ, ե՛լի-ի ընդհանուր համագումարից առաջ, անդամ եկեղեցիների պատգամավորները և այլ հարանվանությունների ներկայացուցիչներն ի մի են հավաքվում՝ ֆենարկելու առաքելության և ավետարանչության հետ կապված հարցերը, ներդաշնակելու իրենց ուժերը Ավետարանի տիեզերական ֆարոչության գործում: Ըստ այդմ, Սալվադորի համաժողովը թվով տասնմեկերորդն էր՝ 1910 թվականի էդինբուրգի Ա միսսիոներական կոնգրեսից սկսյալ:

Նախորդ համաժողովից հետո, որը տեղի ունեցավ ԱՄՆ-ի Սան-Անտոնիո քաղաքում 1989-ին, աշխարհն ականատես եղավ արմատական փոփոխությունների ու տեղաշարժերի: Խորհրդային Միության փայլալու-մով և «երկաթե վարագույրի» խորտակմամբ աշխարհն իրեն գտավ մի նոր իրադրության առջև: Թվում էր, թե «խորհրդային սպառնալիքի» վերացումով չարիքը պետք է վերանցար և պիտի սկսվեր համաշխարհային խաղաղության, բարգավաճման ու ներդաշնակության դարաշրջանը: Սակայն համաշխարհային հասարակությունը շուտով ցնցվեց ազգա-միջյան պատերազմների թռուռուներից, որոնք բռնկվեցին Արևելյան եվրոպայի երկրներում: Արյունահեղություններն ուղեկցվեցին տնտեսա-կան սուր նգնաժամով: Տասնյակ հազարավոր մարդիկ հասան ծայրագույն աղքատության: Դրությունը շարունակեց մնալ լարված Աֆրիկայի, Ասիայի և Մերձավոր Արևելքի շատ երկրներում:

Ցնցումներից անմասն չմնացին նաև քրիստոնյա եկեղեցիները: Արևելյան եվրոպայի պատմական ուղղափառ եկեղեցիները ֆիզիկապես անպատրաստ գտնվեցին նոր իրադրության առջև՝ չկարողանալով իրենց հոտին ապահովել անհրաժեշտ հոգևոր սնունդով: Օգտվելով առիթից, հազարավոր ֆարոգիչներ հեղեղեցին Արևելյան եվրոպան՝ իրենց ֆարոգության համար պարարտ հող գտնելով այնտեղ: Սկսվեց մարդորսության մրցավազ, որն ուղեկցվեց փոխադարձ մեղադրանք-ներով ու այլամերժությամբ:

Մյուս կողմից, «երրորդ աշխարհի» երկրներում տարիների խուլ բողոք, օտար միսսիոներների կողմից բնիկ մշակույթների հանդեպ եղած արհամարհանքի դեմ, գնալով ավելի վճռական ու սիստեմատիկ բնույթ ստացավ: Էթնիկ գիտակցության ամրապնդման պայմաններում բնիկ ժողովուրդները սկսեցին ընդվզել իրենց պարտադրված ծիսական ու գաղափարական արտահայտչաձևերի դեմ:

Բոլոր այս իրողությունների գնահատման պայմաններում համաժո-ղովը նշանաբան էր ընտրել՝ «Կոչված մեկ հույսի. Ավետարանը տարբեր մշակույթների մեջ»:

Ներկա էին ավելի քան 400 ներկայացուցիչներ աշխարհի գրեթե բոլոր երկրներից: Համաժողովն իր աշխատանքներն սկսեց լիազումար նիստերով, որտեղ ներկայացվեցին բննարկման հիմնական ուղղությունները: Այս համաժողովը բաժանվեց աշխատանքային չորս խմբերի, որոնց խորագրերն էին՝ ա) Վավերական վկայություն յուրաքանչյուր մշակույթի մեջ, բ) Ավետարանն ու ինքնությունը համայնքի մեջ, գ) Տեղական համայնքները բազմադասյան հասարակություններում, և դ) Մեկ Ավետարան, տարբեր արտահայտություններ:

Յուրաքանչյուր խումբ իր հերթին բաժանվեց ենթախմբերի, որտեղ տեղի ունեցան աշխույժ բննարկումներ հրատապ հարցերի շուրջ: Ենթախմբերի պատրաստած բանաձևերը ներկայացվեցին խմբերի լիազումար նիստերին, իսկ խմբերի հաստատած փաստաթղթերը բննարկումներից հետո վավերացվեցին համաժողովի լիազումար նիստերում, որոնք աստվածաբանական հաստատումներ լինելու հավանությունը չունեն, այլ սոսկ եկեղեցիներին ուղղված հրավերներ են՝ ԻԱ դարի շեմին իրենց առաքելության մեջ: Համաժողովը հրապարակեց նաև կոչ՝ ուղղված ամենքին:

Մասնակիցները միահամուռ կերպով պաշտպանեցին Ավետարանի մշակութայնացման գաղափարը՝ դատապարտելով մշակույթների հանդեպ գերակայության դրսևորումներն ու մարդորսության փորձերը:

Համաժողովի աշխատանքներին գուգահեռ տեղի ունեցան հանդիպումներ բնիկ ժողովուրդների, կանանց և երիտասարդության, ինչպես նաև տարբեր եկեղեցիների ու մշակույթների ներկայացուցիչների հետ: Համաժողովի ծրագրի մեջ տեղ էին գտել նաև Աստվածաշնչական ուսումնասիրություններն ու միասնական պաշտամունքի արարողությունները: Առանձնապես հուզիչ և տպավորիչ էր ապաշխարության արարողությունը Սալվադորի հին նավահանգստում, որտեղ 400 տարի շարունակ վաճառքի էին հանվում Աֆրիկայից բերված ստրուկները:

Սույն համաժողովին, հանուն Հայ Առաքելական եկեղեցու, մասնակցեցին Տ. Տաթև արք. Ղարիբյանը, Տ. Վիգեն եպս. Այվազյանը, Տ. Նարեկ ծ. վրդ. Ալեմեզյանը (Կիլիկյան Աթոռի ներկայացուցիչ) և Տ. Միքայել ծ. վրդ. Աջապահյանը:

ՄԻՔԱՅԵԼ Ծ. ՎՐԴ. ԱՋԱՊԱՀՅԱՆ